

鹽山新志
上

671.1209
082
16

6

鹽山新志

卷二十

邑人賈恩紱佩卿纂

人物篇下 列女下

所以前列女事蹟附載

漢桓少君司隸鮑宣妻也宣嘗就少君父學父奇其清苦以女妻之裝送過厚宣不懌曰少君生富驕習美飾而吾實貧賤不敢當禮桓氏曰大人以先生修德守約故使妾侍巾櫛既奉承君子敢不拜命宣笑曰果如是吾志也乃悉歸侍御服飾更衣短布裳與宣共挽鹿車歸鄉里拜姑禮既提甕出汲修行婦道鄉邦稱之後宣仕至司隸校尉

爲世名臣子永中興初爲魯郡太守永子昱一日問少君
曰太夫人甯復識挽鹿車時不少君曰先姑有言存不忘
亡安不忘危焉敢忘乎列女入史始自後漢書桓氏實居
篇首爲古今女宗第一後世稱文學則首班昭稱賢淑則
首少君婦孺類無異詞云

北魏高氏洛州刺史刁遵之妻司空允之女也允爲魏儒
宗名臣史稱高氏聰明婦人其孫沖十三而孤高哀之撫
養尤篤沖卒成名儒少子整少有大度頗涉書史爲滄冀
瀛三州刺史會本鄉喪亂奉其母居齊州崔光崔亮皆允
所接禮之士故涼燠之際光等嘗致拜焉已而卒於齊州

高氏名父之女名宦之妻名子之母名孫之祖母一身蓋具兼之

同治志所載明代列女無多年遠失訪僅據舊志自多闕如舊城南有七女塚爲此邦古蹟舊志云有生七女而無子者父死七女抱土築墳而不詳其時世然明王忠肅有七女塚詩似當在明代以前矣茲於前志中略具生平者仍不忍其湮類別述之以旌其賢不具者則僅列前表之內而不復複述亦徵信之無可如可者也

其卓著賢聲者三人 明侯氏王忠肅翱之側室也夫人張氏嘗爲置妾侯氏逾歲方以告翱不納贈以金幣送還

其家侯矢志不嫁曰豈有大臣妾它適者翱卒侯斬衰哭臨翱子竚感其義留養如庶母禮竟以處女終既卒附翱塋側又李氏典史崔居州妾事居州八月居州歿李年十八無子女矢節以終皆皦然不欺其志者也 于氏李守用妻于擅勇力在室時有賊僧等八人率眾劫其村于戴氊笠登屋投石擊斃數賊賊避其鋒散去于歸後粉黛不施不輕言笑夫歿撫兩子騰蛟騰龍成立戚都督繼光東征過境兵借寓橫暴于時已七十餘毆傷數人戚聞知笑而獎之歎爲異人年八十餘猶健飯勝常人萬厯二十九年含笑而逝 朱氏山西猗氏知縣于廷陳妻崇禎末廷

陳殉闖賊之難朱攜側室趙氏扶棺歸里葬夫教子勤儉
睦嫻與趙氏苦節以終鄉里稱之

其志不可奪力拒迫誘者三人 崔祥妻劉氏年十八夫
亡父母欲嫁之志不可奪撫遺腹子成人一生苦節八十
三歲卒成化中旌表 王憲妻李氏于歸六月而夫卒年
十九歲有遺腹舅姑欲嫁之不從及生子撫養成立終無
二心 劉架妻李氏十七歲夫亡無子舅姑憐之勸他適
不從苦守六十一年卒嘉靖中旌表

其教子成名者四人 楊宏妻趙氏撫遺腹子子亡又撫
遺孫其名爲庠生 貢生張繼世妻邢氏教子格力學爲

廩生 生員劉自持妻張氏撫遺腹子成廩生 生員張鶴妻王氏撫襁褓兒利蒙成庠生利蒙又早卒苦節五十餘年

其一門數節者十人 韓思貴妻邊氏韓思遠妻劉氏娣姒雙節洪武中旌舊志列諸節婦之首 李茂德妻張氏茂德弟仁義妻孫氏興祖妻張氏希賢妻陳氏皆早歲矢志一門四節 廩生劉恆性妻張氏撫二孤曰讓曰慎讓慎之妻皆氏張讓慎相繼亡二張氏撫讓子爲砥入庠一門三節萬厯間旌 生員李遷桂妻祁氏撫遺孤繼元成立娶妻王氏繼元復早卒姑婦矢志一門雙節此外復有

一二烈婦詳具貞烈篇

清以來列女事蹟附載

清以來節烈之行率有方志可稽同治捻匪之亂殉節者
劉淮炆爲著輝管奇節錄光緒中修府志亦多續訪以故
光緒以前之貞孝節烈頗鮮挂漏茲於行實有紀者更端
詳述餘皆列前表

其貞潔有賢行者三十七人 李氏明舉人趙景皋妻翰
林爾孫之母也景皋儒行重一鄉氏性溫淑能得嚴姑歡
心有脂粉田數十畝出爲公產析及諸兄弟不自私 吳
氏生員劉執中妾舉人韓峰起爲作傳峰起爲鄒縣號循

吏者也其傳曰吳氏孝名鄉庠生劉執中妾也執中四十無子且喪偶因納之時吳年十七越七年執中卒執中父南庭翁年七十有七博學能文賓介於鄉飲者三貧乏不事生產一廬寂守晏如也翁伏枕涕諭吳曰吾子死矣汝年方幼上無姑下無子中無兄弟妯娌吾須臾不死願親視汝改適也吳跪而涕曰翁年高多病妾安忍去翁固強之吳姑曰翁百年後妾去未晚也晝夜紡績爲奉養資翁齒缺咬而食之手除污穢時理衽席越十二年翁卒殯殮無資撫簣號泣翁族姪庠生爲砥感其孝醵金襄事乃引吳前言相勸吳曰妾復何事哉妾奉翁艱苦備歷惕惕然

恐不耐迤邐再拋翁而亡也妾夫不瞑目之責妾負之矣
今幸養生送死差爲無憾吾死且快妾復何事哉爲砥義
之爲割田十餘畝中門外設小室一椽奉事之幾三十年
狀聞有司扁其門曰苦節亡年六十有四附葬於執中之
墓爲砥命其子運祺爲之祭掃至今不衰云 宗氏生員
楊于庭妻二十二歲守節長子方烈五歲次子續烈二歲
上事衰姑比子職家素貧儉積漸豐崇禎己卯邑被清兵
之難收養難婦王氏等十餘人裹糧送歸其里會歲飢煮
粥以食飢人存活甚眾壽六十九歲無疾而終二子均成
名 杜氏生員崔夢龍繼室二十八歲邑被兵與夫同遇

害氏死而蘇矢志不嫁奉姑以老家素封以夫弟任俠萬畝立盡氏既不怨且廣其兒輩曰天也叔何尤邵氏舉人趙爾誥妻進士泚女性嚴毅以禮法自持生產甚薄而奉翁飲食必潔必精夫亡家益窘長男及婦相繼亡遺三孫氏素知書從傳之餘必爲談古今忠孝節義以訓之衣食雖艱取與一無所苟故諸孫東秀東元東魁皆以文行重於時李氏州同劉熙妻性淑慧善事翁姑翁泳任雄縣訓導姑隨之任夫効力河工氏獨留家捫擋內外井井有條子同蘅等六人皆教之有法不以姑息爲愛故皆能成立侯氏廩貢生劉靜年妻寬厚慈和讀書知大義姑

氏衛性明達治家有規矩氏以樸誠肫摯體之奉先啟後
能恪遵其禮法子曾璇等幼時口授以論語毛詩長就傳
重道尊師脩膳豐潔母家素封有匱資數百金未析箸時
盡出之以佐公用救急周貧親族多沐其惠 劉氏張壽
銘妻南康知縣熙之母也幼習詩書通曉大義事翁姑以
孝聞夫性嚴厲訓子時施扑責氏代爲督課篝燈教讀每
至夜分不倦性仁厚喜施予貧窮疾厄者多沾其惠捐資
建橋梁拯急難助成寒士之功名遇鄰人行竊者周給遣
之去善行至多遠近頌之 楊氏太學生孫履隨妻侍郎
葆元之母也性深沈識大體不輕言笑兼涉書史佐夫理

家政勤井曰潔膳饘檢點無遺憾教子有法整肅家規周恤親串宗族極詳以備 劉氏趙世勇妻世勇歿衰姑在堂惟氏是任家素饒自持門戶除奉姑外一意以儉樸率家人性好施予族黨姻婭皆被其德 李氏生員劉沛然妻己卯之變闔門罹害氏及姑僅免氏年二十二歲事姑盡孝供夫木主朝夕謁拜三十餘年如一日 孫氏姜烱妻年二十九夫亡撫育幼子家稍稱溫而應門乏絕外侮內訌沓至氏終不改操以壽終 霍氏生員劉濟之妻己卯邑被兵夫死氏二十七歲子女俱無屏鉛華茹素以見志奉夫木主每食必獻三十餘年如一日 趙氏生員韓

嗣愈妻三十歲夫故子士謙五歲夫弟嗣彥四歲失怙恃
氏延師教讀並聽親族子弟來學不另責贄兩孤先後入
庠及析箸物產聽嗣彥擇取之不求稱順治五年賊至執
氏拷索財物氏大罵賊怒刺殺之三日復蘇壽至八十二
歲 韓氏趙景契妻二十五歲夫故生遺腹子爾宮氏性
婉順孝事舅姑歲荒收糠菜以活戚里郡守徐某謂爲巾
幘偉人 吳氏知縣劉曾璇妻滄州甘肅按察使沂之女
嫻詩書識大體性至孝少隨父任內室火母病在牀氏年
未及笄獨自火中搶負并攜幼弟以出人皆驚異生長華
廬于歸後減簪珥勤紡紉蕭然儒素修行婦道渾厚仁讓

自娣姒族姻以及臧獲輩畢生無間言黽勉有亡襄夫教
子嘗訓子慶元慶凱曰人家子女失教半由母袒護之故
愛之適以害之吾不忍爲也工詩著有雙榕樓詩稿其舟
中卽事云扁舟一葉水迢迢揚子江頭看晚潮遙指綠楊
城郭外月明二十四紅橋聞凱兒牧東平卽寄云喜接娛
親信東原攝篆初鶯聲遷有漸驥足展何如官物休封鮓
家書望寄魚牧民關兩地勉致好名譽早行云雞鳴旅館
檢輕裝古壁燈昏夜氣涼殘夢三更驚幻蝶秋聲一路咽
寒螢明河桂影前村月淺水蘆花隔岸霜掃盡征塵開眼
界迢迢曙色碧天長錄之以見其才行慶凱繼妻周氏亦

能詩

李氏生員趙丹溪妻教諭德輿之母以賢孝著稱
佐夫課子常勗以祖訓家本寒素而性好施捨嘗病目失
明不忘利濟施捨醫藥人感其惠雖乞兒丐婦亦羣爲禱
籲三年目明如初 徐氏生員翟敬止妻二十六歲夫故

孝事舅姑撫二孤子皆入庠先是朱冲斗者貸敬止銀三
百兩未償朱死其子請以弟姪爲質氏焚券而貰之歲歉
買奴婢數人年豐遣歸不問其值守節四十餘年 趙氏
生員劉陞高妻孝子恪侯之母也二十八歲守節事翁姑
以孝撫二孤訓導有方子恪侯力行善事多義舉以爲皆
節母之志 黃建妻某氏遺其姓家貧無子與夫攜二女

謀食於武清年二十八歲夫亡歸嫁次女後復啟其夫厝負骨歸葬故里老依長女卒於武清 李氏范良臣妻二十七歲守節家極貧母家有勸其他適者翦髮自誓勤儉持家家以稍裕延師教孫懋德懋昭皆成立道光十二年歲歉出穀濟貧多所全活苦節五十餘年 陳氏邵潔妻知縣趙炯爲之傳炯長詩古文鹽邑名進士也其傳曰鹽山稱隱君子蓋首處士雙彌邵公云其子崑星公諱泚能以名顯親於時今有節婦備諸善行而卓乎不可殒者則處士弟太室仲公男潔之婦也婦陳氏邑博士員心虞公女公無子子女焉年十有八歸邵六年而夫子云亡其翁